

I. DISPOSICIÓN XERAIS

XEFATURA DO ESTADO

10923 *Lei 3/2020, do 18 de setembro, de medidas procesuais e organizativas para facer fronte ao COVID-19 no ámbito da Administración de xustiza.*

FELIPE VI

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei:

PREÁMBULO

I

O 14 de marzo de 2020, o Consello de Ministros aprobou o Real decreto 463/2020, polo que se declarou o estado de alarma para a xestión da situación de crise sanitaria ocasionada polo COVID-19, no cal se incluíron, entre outras medidas, limitacións á liberdade de circulación das persoas, cos efectos que iso supón para cidadáns, traballadores e empresas. Especificamente, no ámbito da Administración de xustiza dispúxose a suspensión dos termos e prazos procesuais, coas únicas excepcións necesarias para garantir os dereitos recoñecidos a todas as persoas no artigo 24 da Constitución.

Para facer fronte ás posibles consecuencias desas medidas, a Administración de xustiza tivo que adaptarse, tanto desde o punto de vista da adopción dos cambios normativos necesarios nas institucións procesuais como desde a perspectiva organizativa, e todo iso co obxectivo de acadar unha progresiva reactivación do normal funcionamento dos xulgados e tribunais.

En efecto, a Administración de xustiza sufriu unha ralentización significativa como consecuencia da crise do COVID-19, polo que se fixo necesario adoptar o Real decreto lei 16/2020, do 28 de abril, de medidas procesuais e organizativas para facer fronte ao COVID-19 no ámbito da Administración de xustiza, que tivo por finalidade, entre outras, procurar unha saída áxil á acumulación dos procedementos suspendidos pola declaración do estado de alarma cando se producise o levantamento da suspensión.

Así mesmo, adoptáronse medidas en previsión do aumento de litixiosidade como consecuencia das medidas extraordinarias adoptadas e da propia conxuntura económica derivada da crise sanitaria.

Nun Estado social e democrático de dereito como o que vivimos, todos os cidadáns e todas as cidadás teñen que participar do proceso de recuperación das consecuencias da crise. A actual situación sanitaria ten un impacto global e carrexará efectos negativos nun amplo conxunto de colectivos sociais, ben que as consecuencias sociais e económicas afectarán máis gravemente os colectivos vulnerables.

Unha vez superado o estado de alarma, a Administración de xustiza debe adaptarse durante os próximos meses á nova normalidade, tomando en consideración os dereitos e as necesidades da cidadanía como usuaria do servizo público da xustiza en exercicio do dereito á tutela xudicial efectiva, e garantir o dereito á saúde tanto desta como do conxunto do persoal e profesionais do sector da xustiza. Xunto a iso, e en relación co aumento de litixiosidade previsto, a Administración de xustiza debe prepararse non só para lle dar resposta, senón para erixirse en factor determinante no proceso de recuperación económica.

Por iso, nun exercicio conxunto de diálogo con todos os sectores implicados e busca de amplos consensos parlamentarios, esta lei introduce importantes melloras respecto do Real decreto lei 16/2020, adaptando as medidas previstas nel, ampliando nalgúns casos os prazos para a súa aplicación e introducindo novos aspectos nelas, como por exemplo a posta en marcha do taboleiro de edictos xudicial único para a publicación e consulta de resolucións e comunicacións cando o estableza a lei.

Así mesmo, durante o tempo que transcorra ata superar esta nova normalidade e contar con medidas efectivas contra o COVID-19, é imprescindible seguir adoptando medidas organizativas e tecnolóxicas necesarias para evitar situacións de contaxio. A Administración de xustiza, o persoal que presta nela os seus servizos, os profesionais e mesmo os cidadáns adaptámonos con rapidez aos instrumentos tecnolóxicos existentes, téndose ampliado notablemente a súa dotación e optimizado o seu uso durante a pandemia. Esta crise sanitaria fíxonos máis conscientes da necesidade de adaptar a nosa xustiza á realidade dixital, como medio de favorecer a proximidade, a axilidade e a sustentabilidade do servizo público, pero tamén como un medio para a protección da saúde.

Por iso, nesta lei inclúense medidas de carácter organizativo para garantir a distancia de seguridade no desenvolvemento das vistas e audiencias públicas, salvagardando en determinados casos a presencialidade do investigado ou acusado no ámbito penal ou as exploracións médico-forenses, e fóméntanse medidas para incorporar as novas tecnoloxías ás actuacións procesuais e, en xeral, ás relacións dos cidadáns e das cidadás coa Administración de xustiza, que eviten, na medida do posible, excesivas concentracións nas sedes xudiciais.

II

A presente lei estrutúrase en tres capítulos, que conteñen un total de vinte e tres artigos, sete disposicións adicionais, dúas disposicións transitorias, unha disposición derogatoria e trece disposicións derradeiras.

O capítulo I regula as medidas de carácter procesual para establecer a tramitación preferente de determinados procedementos na orde social, civil e contencioso-administrativa directamente xurdidos da crise sanitaria polo COVID-19, así como daqueles que se viron afectados polas consecuencias dela. Entre eles cabe destacar a tramitación mediante a modalidade procesual de conflito colectivo que reviste un carácter urxente e a tramitación preferente da impugnación de expedientes de regulación temporal de emprego a que se refire o artigo 23 do Real decreto lei 8/2020, do 17 de marzo.

No capítulo II inclúense medidas no ámbito concursal e societario. A crise sanitaria do COVID-19 constituíu un obstáculo adicional á viabilidade das empresas concursadas que pode determinar, ben a imposibilidade de subscribir ou cumprir un convenio, abocando as empresas á liquidación, ou ben unha maior dificultade de allear unha unidade produtiva que poida resultar viable. Por iso, o Real decreto lei 11/2020, do 31 de marzo, polo que se adoptaron medidas urxentes complementarias no ámbito social e económico para facer fronte ao COVID-19, estendeu a estas empresas a posibilidade de acceder a un expediente de regulación temporal de emprego nos termos do Real decreto lei 8/2020, do 17 de marzo, de medidas urxentes extraordinarias para facer fronte ao impacto económico e social do COVID-19.

Ás medidas xa adoptadas no dito real decreto lei engádense nesta lei outras cunha tripla finalidade. En primeiro lugar, manter a continuidade económica das empresas, profesionais e autónomos que, con anterioridade á entrada en vigor do estado de alarma, viñan cumprindo regularmente as obrigacións derivadas dun convenio, dun acordo extraxudicial de pagamentos ou dun acordo de refinanciamento homologado. Respecto destes debedores, adíase o deber de solicitar a apertura da fase de liquidación cando, durante a vixencia do convenio, o debedor coñeza a imposibilidade de cumprir os pagamentos comprometidos e as obrigacións contraídas con posterioridade á aprobación daquel; así mesmo, facilítase a modificación do convenio ou do acordo extraxudicial de pagamentos ou do acordo de refinanciamento homologado. Respecto destes últimos

permítese, ademais, a presentación de nova solicitude sen necesidade de que transcorra un ano desde a presentación da anterior.

En segundo lugar, trátase de potenciar e incentivar o financiamento das empresas para atender as súas necesidades transitorias de liquidez, cualificando como créditos contra a masa, chegado o caso de liquidación, os créditos derivados de compromisos de financiamento ou de prestación de garantías a cargo de terceiros, incluídas as persoas especialmente relacionadas co concursado, que figuren na proposta de convenio ou na proposta de modificación do xa aprobado polo xuíz. Neste mesmo sentido, co fin de facilitar o crédito e a liquidez da empresa, cualifícanse como ordinarios os créditos das persoas especialmente vinculadas co debedor nos concursos que poidan declararse dentro dos dous anos seguintes á declaración do estado de alarma.

Por último, para evitar o previsible aumento de litixiosidade en relación coa tramitación de concursos de acredores nos xulgados do mercantil e de primeira instancia, establécese unha serie de normas de axilización do proceso concursal, como a non necesidade de celebración de vistas, a confesión da insolvencia, a tramitación preferente de determinadas actuacións tendentes á protección dos dereitos dos traballadores, a manter a continuidade da empresa e a conservar o valor de bens e dereitos, así como a simplificación de determinados actos e incidentes (poxas, impugnación de inventario e listas de acredores ou aprobación de plans de liquidación).

Finalmente, dentro deste capítulo II establécese dúas normas que tratan de atenuar, temporal e excepcionalmente, as consecuencias que tería a aplicación na actual situación das normas xerais sobre disolución de sociedades de capital e sobre declaración de concurso, de modo tal que se lles permita ás empresas gañar tempo para poder reestruturar a súa débeda, conseguir liquidez e compensar perdas, xa sexa pola recuperación da súa actividade ordinaria ou polo acceso ao crédito ou ás axudas públicas. Desta forma, amplíase a suspensión do deber de solicitar a declaración de concurso de acredores ata o 31 de decembro de 2020 e prevese que, para os efectos da causa legal de disolución por perdas, non se computen as do presente exercicio.

Ao fío do anterior, na disposición derogatoria derrégase o artigo 43 do Real decreto lei 8/2020, do 17 de marzo, de medidas urxentes extraordinarias para facer fronte ao impacto económico e social do COVID-19, que establecía a suspensión do deber de solicitar o concurso durante a vixencia do estado de alarma e prevía que os xuíces non admitirían a trámite solicitudes de concurso necesario ata transcorridos dous meses desde a finalización do dito estado.

Trátase, en definitiva, de evitar declaracións de concurso ou apertura da fase de liquidación respecto de empresas que poden ser viables en condicións xerais de mercado (valor en funcionamento superior ao valor de liquidación), coa conseguinte destrución de tecido produtivo e de postos de traballo.

O capítulo III regula medidas de carácter organizativo e tecnolóxico destinadas a seguir afrontando as consecuencias, xa expostas, que tivo a crise sobre a Administración de xustiza e ampliar a súa aplicación temporal ata o 20 de xuño de 2021, confiando en que daquela existan todas as garantías sanitarias contra o COVID-19.

Así, establécese a celebración de actos procesuais preferentemente mediante a presenza telemática dos intervinientes para garantir a protección da saúde das persoas e minimizar o risco de contaxio, salvagardando os dereitos de todas as partes do proceso. Non obstante, na orde xurisdiccional penal, a celebración de xuízos preferentemente mediante presenza telemática exceptúase nos supostos de procedementos por delitos graves, ou cando calquera das acusacións solicite a prisión provisional ou se solicite pena de prisión superior a dous anos, en que a presenza física do acusado resulta necesaria.

Igualmente, para atender aos mesmos fins, límitase o acceso do público a todas as actuacións orais tendo en conta as características das salas de vistas. Posibilitase, así, o mantemento das distancias de seguridade e evítanse as aglomeracións e o movemento de persoas nas sedes xudiciais cando non resulte imprescindible.

Coa mesma finalidade establécese un sistema de atención ao público por videoconferencia, vía telefónica ou a través do correo electrónico habilitado para tal efecto,

de tal forma que se limita a atención presencial aos supostos estritamente necesarios e unicamente mediante cita previa.

A recuperación da actividade ordinaria das oficinas xudiciais e fiscais requiriu non dilatar o prazo de reincorporación tras o levantamento das principais restricións e, desta forma, establecer medidas que coadxuvasen a afrontar co menor impacto posible o incremento de litixiosidade.

Deste modo, prevese a creación de unidades xudiciais para o coñecemento de asuntos derivados do COVID-19 e establécese a posibilidade de que os letrados da Administración de xustiza poidan, durante o período de prácticas, realizar funcións de substitución ou reforzo, entre outras medidas. Con iso preténdese atender a urxente necesidade de regularizar a situación de xulgados e tribunais para facer efectivo o dereito á tutela xudicial efectiva sen dilacións indebidas.

Ademais, tal obxectivo debe compatibilizarse coa adecuada protección da saúde do persoal da Administración de xustiza, do resto de profesionais e dos particulares que acoden ás súas sedes. Por iso, precísanse medidas que supoñan a distribución temporal da prestación de servizos por parte do persoal das oficinas xudiciais, de forma que poidan cumprir co seu horario habitual de forma sucesiva. Con tal obxecto, establécese xornadas de traballo de mañá ou de tarde, co fin de evitar a coincidencia de todo o persoal nas mesmas horas. O cumprimento dese horario por parte de distinto persoal ao servizo da Administración de xustiza, mesmo sen ampliación de xornada, permite, ademais, a celebración de xuízos e vistas non só en horario de mañá, senón tamén durante as tardes.

Na disposición derradeira cuarta modifícase a Lei 18/2011, do 5 de xullo, reguladora do uso das tecnoloxías da información e a comunicación na Administración de xustiza, para facilitar o acceso remoto ás aplicacións utilizadas para a xestión procesual, e fomentar así o teletraballo, e modifícase o sistema de identificación e sinatura recoñecidos, disociando un do outro, nos mesmos termos que a Lei 39/2015, do 1 de outubro, do procedemento administrativo común das administracións públicas.

En particular, facilitar o acceso remoto ás aplicacións utilizadas para a xestión procesual, así como o acceso dos cidadáns e das cidadás aos servizos electrónicos na Administración de xustiza, implicará que todos os órganos, oficinas xudiciais e fiscalías se doten dos medios e instrumentos electrónicos e dos sistemas de información necesarios e suficientes para poderen desenvolver a súa función eficientemente. Ao mesmo tempo, realízase unha unificación da publicación de resolucións e comunicacións no taboleiro de edictos xudicial único, que será publicado electronicamente pola Axencia Estatal do Boletín Oficial del Estado, para acabar coa dispersión en taboleiros de anuncios e distintos boletíns oficiais, e reforzar a simplicidade deste trámite e as garantías das partes.

A disposición derradeira quinta modifica e amplía a *vacatio legis* da Lei 20/2011, do 21 de xullo, do Rexistro Civil, ata o 30 de abril de 2021. A actual conxuntura e a necesidade de concentrar os esforzos na recuperación da actividade no Rexistro Civil impide abordar nestes momentos o cambio organizativo e de funcionamento que require en tan curto período de tempo, polo que resulta necesario amplialo para garantir a súa adecuada e plena entrada en vigor. Non obstante, prevese a súa entrada en vigor para as oficinas consulares do Rexistro Civil o día 1 de outubro de 2020 e aplicarase de forma progresiva.

Coa disposición derradeira sétima introdúcese unha mellora técnica na modificación do artigo 159.4 da Lei 9/2017, do 8 de novembro, de contratos do sector público, aprobada polo Real decreto lei 15/2020, do 21 de abril, de medidas urxentes complementarias para apoiar a economía e o emprego.

Nas disposicións derradeiras oitava e novena amplíase a posibilidade de dispoñibilidade de plans de pensións para os traballadores por conta propia ou autónomos aos casos en que, sen cesaren na súa actividade, tivesen unha redución de, ao menos, o 75 por cento na súa facturación como consecuencia da situación de crise sanitaria.

A modificación realízase mediante axustes puntuais na redacción da disposición adicional vixésima do Real decreto lei 11/2020, do 31 de marzo, para engadir ao suposto xa recollido de cesamento de actividade o novo de redución de facturación en, polo menos, un 75 por cento; a definición do suposto de redución de facturación axústase á empregada

na nova redacción dada polo Real decreto lei 13/2020, do 7 de abril, ao artigo 17 do Real decreto lei 8/2020, do 17 de marzo, en relación coa prestación extraordinaria por cesamento de actividade. Tamén se modifica o artigo 23 do Real decreto lei 15/2020, do 21 de abril, para concretar a xustificación acreditativa desta situación ante a entidade xestora de fondos de pensións.

Sobre esta última cuestión cabe sinalar que, para xustificar a redución da facturación, se fai unha remisión ao xa previsto para a acreditación dese volume de facturación na solicitude de prestación pública extraordinaria por cesamento de actividade do autónomo, que inclúe o mesmo suposto de redución do 75 por cento da facturación. Con iso, a mesma documentación servirá ao traballador autónomo para acreditar a súa circunstancia de redución de facturación tanto no caso da prestación pública coma no da dispoñibilidade dos seus plans de pensións.

Mantéñense todos os demais aspectos da dispoñibilidade de plans de pensións regulados en ambos os reais decretos leis, referentes á contía, vinculada á perda de ingresos netos estimados, e ao período de estado de alarma e un mes adicional.

Así mesmo, a disposición derradeira oitava, tendo en conta os efectos da pandemia e a afectación nos ingresos de moitos fogares, amplía os prazos establecidos nos artigos 4 e 8 do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19, para que o arrendatario de vivenda habitual poida realizar a solicitude de aprazamento temporal e extraordinario do pagamento da renda. Tamén se modifican determinados aspectos do artigo 9 con obxecto de dar maior axilidade á tramitación da liña de axudas transitorias de financiamento, de forma que poida estar operativa para os arrendatarios en situación de vulnerabilidade no prazo máis breve posible.

CAPÍTULO I

Medidas procesuais

Artigo 1. Tramitación da impugnación de expedientes de regulación temporal de emprego a que se refire o artigo 23 do Real decreto lei 8/2020, do 17 de marzo, de medidas urxentes extraordinarias para facer fronte ao impacto económico e social do COVID-19.

1. Tramitaranse conforme a modalidade procesual de conflito colectivo as demandas presentadas polos suxeitos lexitimados a que se refire o punto 2 deste artigo, cando versen sobre as suspensións e reducións de xornada adoptadas en aplicación do previsto no artigo 23 do Real decreto lei 8/2020, do 17 de marzo, e esas medidas afecten máis de cinco traballadores.

2. Ademais dos suxeitos lexitimados conforme o artigo 154 da Lei 36/2011, do 10 de outubro, reguladora da xurisdición social, estará igualmente lexitimada para promover o citado procedemento de conflito colectivo a comisión representativa prevista na normativa laboral ditada para paliar os efectos derivados do COVID-19 en relación cos expedientes de regulación temporal de emprego a que se refire este artigo.

Artigo 2. Tramitación preferente de determinados procedementos.

1. Ata o 31 de decembro de 2020 incluído tramitaranse con preferencia os seguintes expedientes e procedementos:

a) Os procesos ou expedientes de xurisdición voluntaria en que se adopten as medidas a que se refire o artigo 158 do Código civil.

b) Na orde xurisdiccional civil, os procesos derivados da falta de recoñecemento por parte da entidade acreedora da moratoria legal nas hipotecas de vivenda habitual e de inmoables afectos á actividade económica, os procesos derivados de calquera reclamación que poidan presentar os arrendatarios por falta de aplicación da moratoria prevista

legalmente ou da prórroga obrigatoria do contrato, así como os procedementos concursais de debedores que sexan persoas naturais.

c) Na orde xurisdiccional contencioso-administrativa, os recursos que se interpoñan contra os actos e resolucións das administracións públicas polos cales se denegue a aplicación de axudas e medidas previstas legalmente para paliar os efectos económicos da crise sanitaria producida polo COVID-19.

d) Na orde xurisdiccional social, terán carácter urxente e preferente os procesos por despedimento ou extinción de contrato, os derivados do procedemento para declarar o deber e a forma de recuperación das horas de traballo non prestadas durante o permiso retribuído previsto no Real decreto lei 10/2020, do 29 de marzo, polo que se regula un permiso retribuído recuperable para as persoas traballadoras por conta allea que non presten servizos esenciais, co fin de reducir a mobilidade da poboación no contexto da loita contra o COVID-19; os procedementos por aplicación do plan Mecuida do artigo 6 do Real decreto lei 8/2020, do 17 de marzo; as denegacións de prestacións extraordinarias por cesamento de actividade previstas no artigo 17 do dito Real decreto lei 8/2020; os procedementos para a impugnación individual, colectiva ou de oficio dos expedientes de regulación temporal de emprego polas causas reguladas nos artigos 22 e 23 do Real decreto lei 8/2020, do 17 de marzo; os que se tramiten para facer efectiva a modalidade de traballo a distancia ou a adecuación das condicións de traballo previstas no seu artigo 5; as resolucións denegatorias de solicitude do recoñecemento do dereito á asistencia sanitaria, sen prexuízo do desenvolvemento regulamentario da competencia da xurisdición contencioso-administrativa prevista pola disposición transitoria segunda do Real decreto lei 7/2018, do 27 de xullo, sobre o acceso universal ao Sistema nacional de saúde, e as reclamacións sobre condicións de traballo de funcionarios e persoal laboral das administracións públicas.

2. O disposto no punto anterior enténdese sen prexuízo do carácter preferente que teñan recoñecido outros procedementos de acordo coas leis procesuais.

Non obstante, na orde xurisdiccional social, os procedementos para a impugnación individual ou colectiva dos expedientes de regulación temporal de emprego polas causas reguladas nos artigos 22 e 23 do Real decreto lei 8/2020, do 17 de marzo; os que se tramiten para facer efectiva a modalidade de traballo a distancia ou a adecuación das condicións de traballo previstas no seu artigo 5, as denegacións extraordinarias por cesamento de actividade previstas no artigo 17 do dito real decreto lei, as resolucións denegatorias de solicitude do recoñecemento do dereito á asistencia sanitaria, nos termos descritos no punto anterior, e os procedementos para a aplicación do plan Mecuida establecidos no artigo 6 do mencionado Real decreto lei 8/2020, do 17 de marzo, terán carácter urxente para todos os efectos e serán preferentes respecto de todos os que se tramiten no xulgado, salvo os que teñan por obxecto a tutela dos dereitos fundamentais e liberdades públicas.

3. En materia de rexistro civil, tramitaranse de maneira preferente as inscricións de nacementos, matrimonios e defuncións, a expedición de certificacións, incluídas as de fe de vida e estado, os expedientes de matrimonio e celebración de vodas, e o trámite de xura nos expedientes de nacionalidade.

CAPÍTULO II

Medidas concursais e societarias

Artigo 3. *Modificación do convenio concursal.*

1. Ata o 14 de marzo de 2021 incluído, o concursado poderá presentar proposta de modificación do convenio que se encontre en período de cumprimento. Coa solicitude deberase achegar unha relación dos créditos concursais que estean pendentes de pagamento e daqueles que, tendo sido contraídos durante o período de cumprimento do convenio, non fosen satisfeitos, un plan de viabilidade e un plan de pagamentos.

A proposta de modificación tramitarase consonte as mesmas normas establecidas para a aprobación do convenio orixinario, ben que a tramitación será escrita calquera que sexa o número de acredores. As maiorías do pasivo exixibles para a aceptación da proposta de modificación serán as mesmas que as exixidas para a aceptación da proposta do convenio orixinario, calquera que sexa o contido da modificación. En ningún caso a modificación afectará os créditos devindicados ou contraídos durante o período de cumprimento do convenio orixinario nin os acredores privilexiados a que se estendese a eficacia do convenio ou se adherisen a el unha vez aprobado, a menos que voten a favor ou se adhiran expresamente á proposta de modificación.

2. O xuíz dará traslado ao concursado de cantas solicitudes de declaración do incumprimento do convenio presenten os acredores ata o 31 de outubro de 2020 incluído, pero non as admitirá a trámite ata que transcorran tres meses contados desde que finalice ese prazo. Durante eses tres meses o concursado poderá presentar proposta de modificación do convenio, que se tramitará con prioridade á solicitude de declaración de incumprimento.

3. As mesmas regras serán de aplicación aos acordos extraxudiciais de pagamento.

Artigo 4. *Aprazamento do deber de solicitar a apertura da fase de liquidación.*

1. Ata o 14 de marzo de 2021 incluído, o debedor non terá o deber de solicitar a liquidación da masa activa cando coñeza a imposibilidade de cumprir cos pagamentos comprometidos ou coas obrigacións contraídas con posterioridade á aprobación do convenio concursal, sempre que o debedor presente unha proposta de modificación do convenio e esta se admita a trámite dentro do dito prazo. A proposta de modificación do convenio tramitarase conforme o establecido no artigo 3.1.

2. Durante o prazo previsto no punto anterior, o xuíz non ditará auto en que abra a fase de liquidación aínda que o acredor acredite a existencia dalgún dos feitos que poden fundamentar a declaración de concurso.

3. En caso de incumprimento do convenio aprobado ou modificado dentro dos dous anos contados desde o 14 de marzo de 2020, terán a consideración de créditos contra a masa os créditos derivados de ingresos de tesouraría en concepto de préstamos, créditos ou outros negocios de análoga natureza que se lle concedesen ao concursado ou derivados de garantías persoais ou reais constituídas a favor deste por calquera persoa, incluídas as que, segundo a lei, teñan a condición de persoas especialmente relacionadas con el, sempre que no convenio ou na modificación conste a identidade do obrigado e a contía máxima do financiamento que se vai conceder ou da garantía que se vai constituír.

Artigo 5. *Acordos de refinanciamento.*

1. Ata o 14 de marzo de 2021 incluído, o debedor que teña homologado un acordo de refinanciamento poderá modificar o acordo que teña en vigor ou acadar outro novo, aínda que non transcorrese un ano desde a anterior homologación segundo o disposto no artigo 617 do Real decreto lexislativo 1/2020, do 5 de maio, polo que se aproba o texto refundido da Lei concursal.

2. Ata o 31 de outubro de 2020 incluído, o xuíz dará traslado ao debedor de cantas solicitudes de declaración de incumprimento do acordo de refinanciamento presenten os acredores, pero non as admitirá a trámite ata que transcorra un mes contado desde a dita data. Durante ese mes o debedor poderá pór en coñecemento do xulgado competente para a declaración de concurso que iniciou ou pretende iniciar negociacións con acredores para modificar o acordo que ten en vigor homologado ou para acadar outro novo, aínda que non transcorrese un ano desde a anterior solicitude de homologación. Se, dentro dos tres meses seguintes á comunicación ao xulgado, o debedor non alcanzou un acordo de modificación do que ten en vigor ou outro novo, o xuíz admitirá a trámite as solicitudes de declaración de incumprimento presentadas polos acredores.

Artigo 6. *Réxime especial da solicitude de declaración do concurso de acredores.*

1. Ata o 31 de decembro de 2020 incluído, o debedor que se encontre en estado de insolvencia non terá o deber de solicitar a declaración de concurso, comunicase ou non ao xulgado competente a apertura de negociacións cos acredores para acadar un acordo de refinanciamento, un acordo extraxudicial de pagamentos ou adhesións a unha proposta anticipada de convenio.

2. Ata o 31 de decembro de 2020 incluído, os xuíces non admitirán a trámite as solicitudes de concurso necesario que se presentasen desde o 14 de marzo de 2020. Se, ata o 31 de decembro de 2020 incluído, o debedor presentou solicitude de concurso voluntario, admitirase esta a trámite con preferencia, aínda que sexa de data posterior á solicitude de concurso necesario.

3. Se, ata o 31 de decembro de 2020 incluído, o debedor comunicou a apertura de negociacións cos acredores para acadar un acordo de refinanciamento, un acordo extraxudicial de pagamentos ou adhesións a unha proposta anticipada de convenio, observárase o réxime xeral establecido pola lei. Non obstante, nese suposto o debedor non terá o deber de solicitar o concurso ata que transcorran seis meses desde a comunicación.

Artigo 7. *Financiamentos e pagamentos por persoas especialmente relacionadas co debedor.*

1. Nos concursos de acredores que se declaren ata o 14 de marzo de 2022 incluído, terán a consideración de créditos ordinarios, sen prexuízo dos privilexios que lles poidan corresponder, os derivados de ingresos de tesouraría en concepto de préstamos, créditos ou outros negocios de análoga natureza, que desde a declaración do estado de alarma lle fosen concedidos ao debedor por aqueles que, segundo a lei, teñan a condición de persoas especialmente relacionadas con el.

2. Nos concursos de acredores que se declaren no período indicado no punto anterior, terán a consideración de créditos ordinarios, sen prexuízo dos privilexios que lles poidan corresponder, aqueles en que se subrogasen os que segundo a lei teñan a condición de persoas especialmente relacionadas co debedor como consecuencia dos pagamentos dos créditos ordinarios ou privilexiados realizados por conta deste, a partir da declaración dese estado.

Artigo 8. *Impugnación do inventario e da lista de acredores.*

1. Ata o 14 de marzo de 2022 incluído, nos incidentes que se incoen para resolver as impugnacións do inventario e da lista de acredores, non será necesaria a celebración de vista, salvo que o xuíz do concurso resolva outra cousa.

2. A falta de contestación á demanda por calquera dos demandados considerarase achantamento, salvo que se trate de acredores de dereito público.

3. Os medios de proba de que intenten valerse as partes deberán achegar necesariamente coa demanda incidental de impugnación e coas contestacións que se presenten.

Artigo 9. *Tramitación preferente.*

Ata o 14 de marzo de 2021 incluído, tramitaranse con carácter preferente:

- a) Os incidentes concursais en materia laboral.
- b) As actuacións orientadas ao alleamento de unidades produtivas ou á venda en globo dos elementos do activo.
- c) As propostas de convenio ou de modificación dos que estean en período de cumprimento, así como os incidentes do posición á aprobación xudicial do convenio.
- d) Os incidentes concursais en materia de reintegración da masa activa.

e) A admisión a trámite da solicitude de homologación dun acordo de refinanciamento ou da modificación do que estea vixente.

f) A adopción de medidas cautelares e, en xeral, calquera outra que, ao xuízo do xuízo do concurso, poidan contribuír ao mantemento e á conservación dos bens e dereitos.

g) O concurso consecutivo dunha persoa natural en insolvencia actual, que careza de masa activa e da posibilidade de presentar un plan de pagamentos, instado por mediador, en que conste lista de acredores provisional, cualificación fortuíta e solicitude do beneficio de exoneración do pasivo insatisfeito, xunto con declaración responsable por parte do debedor en que manifieste que non dispón de ningún activo.

h) O beneficio de exoneración do pasivo insatisfeito.

Artigo 10. *Alleamento da masa activa.*

1. Nos concursos de acredores que se declaren ata o 14 de marzo de 2021 incluído e naqueles que se encontren en tramitación na data de entrada en vigor da presente lei, a poxa de bens e dereitos da masa activa poderá realizarse ben mediante poxa, xudicial ou extraxudicial, ben mediante calquera outro modo de realización autorizado polo xuízo de entre os previstos no Real decreto legislativo 1/2020, do 5 de maio, polo que se aproba o texto refundido da Lei concursal. Con carácter preferente e sempre que sexa posible, a poxa realizarase de maneira telemática.

2. Se o xuízo, en calquera estado do concurso, autorízase a realización directa dos bens e dereitos afectos a privilexio especial ou a dación en pagamento ou para pagamento de tales bens, observarase o disposto nos termos da autorización.

Artigo 11. *Aprobación do plan de liquidación.*

O letrado da Administración de xustiza acordará de inmediato a posta de manifesto na oficina do xulgado dos plans de liquidación xa presentados pola administración concursal no momento da entrada en vigor da presente lei. Unha vez transcorrido o prazo legal para formular observacións ou propostas de modificación, porao en coñecemento do xuízo do concurso, quen deberá ditar auto de inmediato en que, segundo coide conveniente para o interese do concurso, aprobará o plan de liquidación coas modificacións que xulgue necesarias ou oportunas.

Artigo 12. *Axilización da tramitación do acordo extraxudicial de pagamentos, concurso consecutivo e beneficio de exoneración do pasivo insatisfeito.*

Ata o 14 de marzo de 2021 incluído, considerarase que o debedor intentou o acordo extraxudicial de pagamentos sen éxito, se se acredita que se produciron dúas faltas de aceptación do mediador concursal para ser designado, para os efectos de iniciar concurso consecutivo, comunicándoo ao xulgado.

Artigo 13. *Suspensión da causa de disolución por perdas.*

1. Para os únicos efectos de determinar a concurrencia da causa de disolución prevista no artigo 363.1.e) do texto refundido da Lei de sociedades de capital, aprobado polo Real decreto legislativo 1/2010, do 2 de xullo, non se tomarán en consideración as perdas do exercicio 2020. Se no resultado do exercicio 2021 se aprecian perdas que deixen reducido o patrimonio neto a unha cantidade inferior á metade do capital social, os administradores deberán convocar ou calquera socio poderá solicitar, no prazo de dous meses contado desde o peche do exercicio, conforme o artigo 365 da citada lei, a celebración de xunta xeral para disolver a sociedade, a non ser que se aumente ou reduza o capital na medida suficiente.

2. O disposto no punto anterior enténdese sen prexuízo do deber de solicitar a declaración de concurso de acordo co establecido na presente lei.

CAPÍTULO III

Medidas organizativas e tecnolóxicas*Artigo 14. Celebración de actos procesuais mediante presenza telemática.*

1. Ata o 20 de xuño de 2021 incluído, constituído o xulgado ou tribunal na súa sede, os actos de xuízo, comparecencias, declaracións e vistas e, en xeral, todos os actos procesuais se realizarán preferentemente mediante presenza telemática, sempre que os xulgados, tribunais e fiscalías teñan á súa disposición os medios técnicos necesarios para iso.

2. Non obstante o disposto no punto anterior, na orde xurisdiccional penal será necesaria a presenza física do acusado nos xuízos por delito grave.

Tamén se requirirá a presenza física do investigado ou acusado, por petición propia ou da súa defensa letrada, na audiencia prevista no artigo 505 da Lei de axuízamento criminal, cando calquera das acusacións solicite a súa prisión provisional ou nos xuízos cando algunha das acusacións solicite pena de prisión superior aos dous anos, salvo que concorran causas xustificadas ou de forza maior que o impidan.

Cando se dispoña a presenza física do acusado ou do investigado, será tamén necesaria a presenza física da súa defensa letrada, por petición desta ou do propio acusado ou investigado.

3. As deliberacións dos tribunais terán lugar en réxime de presenza telemática cando se conte cos medios técnicos necesarios para iso.

4. O disposto no punto primeiro será tamén aplicable aos actos que se practiquen nas fiscalías.

5. Adoptaranse as medidas necesarias para asegurar que no uso de métodos telemáticos se garanten os dereitos de todas as partes do proceso. En especial, deberase garantir en todo caso o dereito de defensa dos acusados e investigados nos procedementos penais, en particular o dereito á asistencia letrada efectiva, á interpretación e tradución e á información e acceso aos expedientes xudiciais.

6. Nos actos que se realicen mediante presenza telemática, o xuíz ou letrado da Administración de xustiza ante quen se realicen poderá decidir a asistencia presencial á sede do xulgado ou tribunal dos comparecentes que considere necesarios.

Artigo 15. Acceso ás salas de vistas.

Co fin de garantir a protección da saúde das persoas, ata o 20 de xuño de 2021 incluído, o órgano xudicial ordenará, en atención ás características das salas de vistas, o acceso do público a todas as actuacións orais. Cando se dispoña dos medios materiais para iso, poderá acordar tamén a emisión das vistas mediante sistemas de difusión telemática da imaxe e o son.

Artigo 16. Exploracións médico-forenses e dos equipos psicosociais.

Ata o 20 de xuño de 2021 incluído, os informes médico-forenses poderán realizarse baseándose unicamente na documentación médica existente á súa disposición, que poderá ser requirida a centros sanitarios ou ás persoas afectadas para que sexa remitida por medios telemáticos, sempre que sexa posible.

Do mesmo modo poderán actuar os equipos psicosociais de menores e familia e as unidades de valoración integral de violencia sobre a muller.

De oficio, ou por requirimento de calquera das partes ou do facultativo encargado, o xuíz poderá acordar que a exploración se realice de forma presencial.

Artigo 17. Dispensa da utilización de togas.

Ata o 20 de xuño de 2021 incluído, as partes que asistan a actuacións orais estarán dispensadas do uso de togas nas audiencias públicas.

Artigo 18. Atención ao público.

1. Ata o 20 de xuño de 2021 incluído, a atención ao público en calquera sede xudicial ou da fiscalía realizarase por videoconferencia, por vía telefónica ou a través do correo electrónico habilitado para tal efecto, que deberá ser obxecto de publicación na páxina web da correspondente xerencia territorial do Ministerio de Xustiza ou do órgano que determinen as comunidades autónomas con competencias en materia de xustiza, e que no ámbito da xurisdición militar se encontra publicado na páxina web do Ministerio de Defensa na ligazón correspondente. Todo iso sempre que sexa posible en función da natureza da información requirida e, en todo caso, cumprindo o disposto na Lei orgánica 3/2018, do 5 de decembro, de protección de datos persoais e garantía dos dereitos dixitais.

2. Para aqueles casos en que resulte imprescindible acudir á sede xudicial ou da fiscalía, será necesario para o público obter previamente a correspondente cita, de conformidade cos protocolos que para o efecto establezan as administracións competentes, que deberán prever as particularidades das comparecencias ante os xulgados en funcións de garda e os xulgados de violencia sobre a muller.

Artigo 19. Órganos xudiciais asociados ao COVID-19.

1. De conformidade coa Lei 38/1988, do 28 de decembro, de demarcación e de planta xudicial, o Ministerio de Xustiza, logo de informe do Consello Xeral do Poder Xudicial e logo de audiencia preceptiva da comunidade autónoma afectada, poderá transformar os órganos xudiciais que estean pendentes de entrada en funcionamento no momento da entrada en vigor da presente lei en órganos xudiciais que coñezan exclusivamente de procedementos asociados ao COVID-19.

2. Habilítase o Ministerio de Xustiza para que, oído o Consello Xeral do Poder Xudicial, poida anticipar a entrada en funcionamento dos órganos xudiciais correspondentes á programación de 2020. Poderanse dedicar todos ou algúns deles con carácter exclusivo ao coñecemento de procedementos asociados ao COVID-19.

Artigo 20. Asignación preferente de xuíces de adscrición territorial.

Os xuíces de adscrición territorial por designación do presidente do Tribunal Superior de Xustiza poderán exercer as súas funcións xurisdicionais, con carácter preferente, en órganos xudiciais que coñezan de procedementos asociados ao COVID-19.

Artigo 21. Actuacións dentro dun mesmo centro de destino.

1. Ata o 20 de xuño de 2021 incluído, os secretarios coordinadores provinciais poderán asignar aos letrados da Administración de xustiza e demais funcionarios ao servizo da Administración de xustiza destinados en calquera das unidades procesuais de apoio directo a órganos xudiciais a realización de calquera das funcións que, sendo propias do corpo a que pertencen, estean atribuídas a calquera outra unidade.

2. Nos partidos xudiciais en que non se encontren aprobadas as correspondentes relacións de postos de traballo, a asignación de funcións, no mesmo período establecido no punto anterior, poderá realizarse entre o persoal destinado en calquera órgano unipersoal ou colexiado.

3. Na asignación que regulan os dous puntos anteriores daráselles preferencia aos letrados de Administración de xustiza e demais persoal ao servizo da Administración de xustiza que accedan voluntariamente e en ningún caso implicará variación de retribucións.

A decisión de asignación adoptarase, en todo caso, mediante resolución motivada que se fundamentará en que a medida resulta imprescindible para garantir a correcta prestación do servizo.

Así mesmo, esta asignación só se poderá realizar entre unidades ou órganos que radiquen no mesmo municipio e que pertencen á mesma orde xurisdicional en que o letrado ou funcionario veña realizando a súa actividade profesional.

Artigo 22. *Xornada laboral.*

1. Ata o 20 de xuño de 2021 incluído, poderanse establecer, para os letrados da Administración de xustiza e para o resto de persoal ao servizo da Administración de xustiza, xornadas de traballo de mañá e tarde para todos os servizos e órganos xurisdicionais, logo de negociación colectiva coas organizacións sindicais e respectando en todo caso as medidas de seguridade laboral e prevención de riscos laborais.

2. O Ministerio de Xustiza e as comunidades autónomas con competencias en materia de xustiza establecerán a distribución da xornada e a fixación dos horarios de conformidade co establecido na Lei orgánica 6/1985, do 1 de xullo, do poder xudicial.

Artigo 23. *Substitución e reforzo de letrados da Administración de xustiza en prácticas.*

1. Ata o 20 de xuño de 2021 incluído, as ensinanzas prácticas dos cursos de formación inicial do corpo de letrados da Administración de xustiza a que se refire o artigo 24 do Estatuto do organismo autónomo Centro de Estudos Xurídicos, aprobado polo Real decreto 312/2019, do 26 de abril, poderán realizarse desempeñando labores de substitución e reforzo cando así o determine a dirección do centro garantindo o pleno cumprimento dos obxectivos formativos, e terán preferencia sobre os letrados substitutos en calquera chamamento para o exercicio de tales funcións.

En ningún caso se poderá remover un letrado substituto en funcións para nomear no seu lugar un letrado en prácticas.

2. Os letrados da Administración de xustiza que realicen os labores de substitución e reforzo conforme o punto anterior exercerán as súas funcións con idéntica amplitude á dos titulares e quedarán á disposición da secretaría de goberno correspondente.

A persoa titular da secretaría de goberno deberá elaborar un informe sobre a dedicación e o rendemento no desempeño das súas funcións, que deberá remitir ao Centro de Estudos Xurídicos para a súa avaliación.

3. En todo caso, o Centro de Estudos Xurídicos garantirá a adecuada titoría das prácticas, para cuxo efecto as secretarías de goberno prestarán a debida colaboración.

4. Os letrados da Administración de xustiza en prácticas que realicen labores de substitución e reforzo percibirán a totalidade das retribucións correspondentes ao posto de traballo desempeñado, que serán aboadas polo Ministerio de Xustiza.

Disposición adicional primeira. *Ampliación de prazos no ámbito do Rexistro Civil.*

1. Nos expedientes de autorización para contraer matrimonio en que se ditase resolución estimatoria, concederáse automaticamente un prazo ata o 20 de xuño de 2021 incluído para a celebración do matrimonio.

2. O disposto no punto anterior aplicarase igualmente a aqueles expedientes en que non transcorrese o prazo dun ano desde a publicación de edictos, da súa dispensa ou das dilixencias substitutorias que prevé o artigo 248 do Regulamento da Lei do Rexistro Civil, aprobado polo Decreto do 14 de novembro de 1958.

Disposición adicional segunda. *Suspensión da causa de disolución do artigo 96.1.e) da Lei 40/2015, do 1 de outubro, de réxime xurídico do sector público.*

O previsto nos artigos 96.1.e) e 96.3 da Lei 40/2015, do 1 de outubro, de réxime xurídico do sector público, non será de aplicación para as contas anuais aprobadas durante os exercicios 2020, 2021 e 2022.

Disposición adicional terceira. *Adecuación de determinadas disposicións á xurisdición militar.*

1. A referencia aos letrados da Administración de xustiza recollida no artigo 21 da presente lei deberá entenderse tamén referida aos secretarios relatores no ámbito da xurisdición militar.

2. O disposto no artigo 14 non será de aplicación aos procesos penais militares.

Disposición adicional cuarta. *Actos de comunicación do Ministerio Fiscal.*

Suspéndese a aplicación do disposto no artigo 151.2 da Lei 1/2000, do 7 de xaneiro, de axuízamento civil, en relación cos actos de comunicación do Ministerio Fiscal, ata o 31 de decembro de 2020 incluído. Ata esa data, o prazo regulado no dito artigo será de dez días naturais.

Disposición adicional quinta. *Creación de unidades xudiciais.*

O Goberno, logo de negociación coas comunidades autónomas en materia de xustiza, promoverá a creación de, polo menos, cen novas unidades xudiciais nun prazo de tres anos, das cales ao menos un terzo se crearán no primeiro ano, coa finalidade de adecuar a planta xudicial ás necesidades derivadas da crise provocada polo COVID-19 e de garantir á cidadanía a efectividade da protección xudicial dos seus dereitos. Para iso, o Goberno dotará as partidas e transferencias orzamentarias necesarias e suficientes.

Disposición adicional sexta. *Indicacións das autoridades sanitarias.*

As medidas organizativas previstas no capítulo III serán executadas polo Ministerio de Xustiza ou polas comunidades autónomas que asumisen competencias en medios materiais e persoais ao servizo da Administración de xustiza, seguindo as indicacións que en cada momento establezan as autoridades sanitarias, logo de consulta ao Consello Xeral do Poder Xudicial e á Fiscalía Xeral do Estado, oídos os colexios profesionais e, cando proceda, coa participación das organizacións sindicais.

Disposición adicional sétima. *Cambio extraordinario das circunstancias contractuais.*

O Goberno presentará ás comisións de xustiza do Congreso dos Deputados e do Senado, nun prazo non superior a tres meses, unha análise e estudo sobre as posibilidades e opcións legais, incluídas as existentes en dereito comparado, de incorporar no réxime xurídico de obrigacións e contratos a regra *rebus sic stantibus*. O estudo incluírá os datos dispoñibles máis significativos sobre o impacto da crise derivada do COVID-19 nos contratos privados.

Disposición transitoria primeira. *Réxime transitorio das actuacións procesuais.*

1. As normas da presente lei aplicaranse a todas as actuacións procesuais que se realicen a partir da súa entrada en vigor, calquera que sexa a data de iniciación do proceso en que aquelas se produzan.

2. Non obstante, as actuacións procesuais iniciadas conforme o previsto nos artigos 3 a 5 do Real decreto lei 16/2020, do 28 de abril, de medidas procesuais e organizativas para facer fronte ao COVID-19 no ámbito da Administración de xustiza, rexeranse conforme os ditos artigos ata a súa conclusión.

Disposición transitoria segunda. *Previsións en materia de medidas organizativas e tecnolóxicas.*

As medidas contidas no capítulo III desta lei serán de aplicación en todo o territorio nacional ata o 20 de xuño de 2021 incluído. Non obstante, se na dita data se mantiver a situación de crise sanitaria, as medidas contidas no citado capítulo III serán de aplicación en todo o territorio nacional ata que o Goberno declare de maneira motivada e de acordo coa evidencia científica dispoñible, logo de informe do Centro de Coordinación de Alertas e Emerxencias Sanitarias, a finalización da situación de crise sanitaria ocasionada polo COVID-19.

Disposición derogatoria única.

1. Queda derogado o Real decreto lei 16/2020, do 28 de abril, de medidas procesuais e organizativas para facer fronte ao COVID-19 no ámbito da Administración de xustiza.

2. Queda derogado o artigo 43 do Real decreto lei 8/2020, do 17 de marzo, de medidas urxentes extraordinarias para facer fronte ao impacto económico e social do COVID-19.

Disposición derradeira primeira. *Modificación da Lei 2/1974, do 13 de febreiro, sobre colexios profesionais.*

Engádese unha nova disposición adicional sexta á Lei 2/1974, do 13 de febreiro, sobre colexios profesionais, coa seguinte redacción:

«Disposición adicional sexta. *Sesións telemáticas.*

De conformidade co disposto no artigo 17 da Lei 40/2015, do 1 de outubro, de réxime xurídico do sector público, todos os órganos colexiados das corporacións colexiais se poderán constituír, convocar, celebrar as súas sesións, adoptar acordos e remitir actas tanto de forma presencial como a distancia, salvo que o seu regulamento interno recolla expresa e excepcionalmente o contrario. En todo caso, estas previsións poderán ser desenvolvidas polos correspondentes regulamentos de réxime interno ou normas estatutarias.»

Disposición derradeira segunda. *Modificación da Lei 29/1998, do 13 de xullo, reguladora da xurisdición contencioso-administrativa.*

Modifícase a Lei 29/1998, do 13 de xullo, reguladora da xurisdición contencioso-administrativa, nos seguintes termos:

Un. Modifícase o punto 6 do artigo 8, que queda redactado da seguinte maneira:

«6. Coñecerán tamén os xulgados do contencioso-administrativo das autorizacións para a entrada en domicilios e restantes lugares cuxo acceso requira o consentimento do seu titular, sempre que iso proceda para a execución forzosa de actos da Administración pública, salvo que se trate da execución de medidas de protección de menores acordadas pola entidade pública competente na materia.

Así mesmo, corresponderá aos xulgados do contencioso-administrativo a autorización ou ratificación xudicial das medidas adoptadas consonte a lexislación sanitaria que as autoridades sanitarias consideren urxentes e necesarias para a saúde pública e impliquen limitación ou restrición de dereitos fundamentais cando tales medidas estean plasmadas en actos administrativos singulares que afecten unicamente un ou varios particulares concretos e identificados de maneira individualizada.

Ademais, os xulgados do contencioso-administrativo coñecerán das autorizacións para a entrada e inspección de domicilios, locais, terreos e medios de transporte que fose acordada pola Comisión Nacional da Competencia cando, requirindo o dito acceso e inspección o consentimento do seu titular, este se opoña ou exista risco de tal oposición.»

Dous. Modifícase o artigo 10, que queda redactado da seguinte maneira:

«Artigo 10. *Competencias das salas do contencioso-administrativo dos tribunais superiores de xustiza.*

1. As salas do contencioso-administrativo dos tribunais superiores de xustiza coñecerán en única instancia dos recursos que se deduzan en relación:

a) Cos actos das entidades locais e das administracións das comunidades autónomas, cuxo coñecemento non estea atribuído aos xulgados do contencioso-administrativo.

b) Coas disposicións xerais emanadas das comunidades autónomas e das entidades locais.

c) Cos actos e disposicións dos órganos de goberno das asembleas lexislativas das comunidades autónomas e das institucións autonómicas análogas ao Tribunal de Contas e ao Defensor do Pobo, en materia de persoal, administración e xestión patrimonial.

d) Cos actos e resolucións ditados polos tribunais económico-administrativos rexionais e locais que poñan fin á vía económico-administrativa.

e) Coas resolucións ditadas polo Tribunal Económico-Administrativo Central en materia de tributos cedidos.

f) Cos actos e disposicións das xuntas electorais provinciais e de comunidades autónomas, así como os recursos contencioso-electorais contra acordos das xuntas electorais sobre proclamación de electos e elección e proclamación de presidentes de corporacións locais, nos termos da lexislación electoral.

g) Cos convenios entre administracións públicas cuxas competencias se exerzan no ámbito territorial da correspondente comunidade autónoma.

h) Coa prohibición ou coa proposta de modificación de reunións previstas na Lei orgánica 9/1983, do 15 de xullo, reguladora do dereito de reunión.

i) Cos actos e resolucións ditados por órganos da Administración xeral do Estado cuxa competencia se estenda a todo o territorio nacional e cuxo nivel orgánico sexa inferior ao de ministro ou secretario de Estado en materias de persoal, propiedades especiais e expropiación forzosa.

j) Cos actos e resolucións dos órganos das comunidades autónomas competentes para a aplicación da Lei de defensa da competencia.

k) Coas resolucións ditadas polo órgano competente para a resolución de recursos en materia de contratación, previsto no artigo 311 da Lei 30/2007, do 30 de outubro, de contratos do sector público, en relación cos contratos incluídos no ámbito competencial das comunidades autónomas ou das corporacións locais.

l) Coas resolucións ditadas polos tribunais administrativos territoriais de recursos contractuais.

m) Con calquera outra actuación administrativa non atribuída expresamente á competencia doutros órganos desta orde xurisdiccional.

2. Coñecerán, en segunda instancia, das apelacións promovidas contra sentenzas e autos ditados polos xulgados do contencioso-administrativo, e dos correspondentes recursos de queixa.

3. Tamén lles corresponde, consonte o establecido nesta lei, o coñecemento dos recursos de revisión contra as sentenzas firmes dos xulgados do contencioso-administrativo.

4. Coñecerán das cuestións de competencia entre os xulgados do contencioso-administrativo con sede na comunidade autónoma.

5. Coñecerán do recurso de casación para a unificación de doutrina previsto no artigo 99.

6. Coñecerán do recurso de casación en interese da lei previsto no artigo 101.

7. Coñecerán da solicitude de autorización ao abeiro do artigo 122 ter, cando sexa formulada pola autoridade de protección de datos da comunidade autónoma respectiva.

8. Coñecerán da autorización ou ratificación xudicial das medidas adoptadas consonte a lexislación sanitaria que as autoridades sanitarias de ámbito distinto ao estatal consideren urxentes e necesarias para a saúde pública e impliquen a limitación ou restrición de dereitos fundamentais cando os seus destinatarios non estean identificados individualmente.»

Tres. Modifícase o punto 1 do artigo 11, que queda redactado da seguinte maneira:

«1. A Sala do Contencioso-Administrativo da Audiencia Nacional coñecerá en única instancia:

a) Dos recursos que se deduzan en relación coas disposicións xerais e cos actos dos ministros e dos secretarios de Estado en xeral e en materia de persoal cando se refiran ao nacemento ou extinción da relación de servizo de funcionarios de carreira. Así mesmo, coñecerá dos recursos contra os actos de calquera órgano central do Ministerio de Defensa referidos a ascensos, orde e antigüidade no escalafón e destinos.

b) Dos recursos contra os actos dos ministros e secretarios de Estado cando rectifiquen en vía de recurso ou en procedemento de fiscalización ou de tutela os ditados por órganos ou entes distintos con competencia en todo o territorio nacional.

c) Dos recursos en relación cos convenios entre administracións públicas non atribuídos aos tribunais superiores de xustiza.

d) Dos actos de natureza económico-administrativa ditados polo ministro de Economía e Facenda e polo Tribunal Económico-Administrativo Central, con excepción do disposto no artigo 10.1.e).

e) Dos recursos contra os actos ditados pola Comisión de Vixilancia de Actividades de Financiamento do Terrorismo, e da autorización de prórroga dos prazos das medidas da dita comisión, conforme o previsto na Lei de prevención e bloqueo do financiamento do terrorismo.

f) As resolucións ditadas polo Tribunal Administrativo Central de Recursos Contractuais, con excepción do disposto no artigo 10.1.k).

g) Dos recursos contra os actos do Banco de España, da Comisión Nacional do Mercado de Valores e do FROB adoptados conforme o previsto na Lei 11/2015, do 18 de xuño, de recuperación e resolución de entidades de crédito e empresas de servizos de investimento.

h) Dos recursos interpostos pola Comisión Nacional dos Mercados e da Competencia en defensa da unidade de mercado.

i) Da autorización ou ratificación xudicial das medidas adoptadas consonte a lexislación sanitaria que a autoridade sanitaria estatal considere urxentes e necesarias para a saúde pública e impliquen a limitación ou restrición de dereitos fundamentais, cando os seus destinatarios non estean identificados individualmente.»

Catro. Engádesse un novo artigo 122 *quáter*, co seguinte contido:

«Artigo 122 *quáter*. *Autorización ou ratificación xudicial das medidas que as autoridades sanitarias consideren urxentes e necesarias para a saúde pública e impliquen limitación ou restrición de dereitos fundamentais.*

Na tramitación das autorizacións ou ratificacións a que se refiren os artigos 8.6, segundo parágrafo, 10.8 e 11.1.i) da presente lei será parte o Ministerio Fiscal. Esta tramitación terá sempre carácter preferente e deberá resolverse nun prazo máximo de tres días naturais.»

Disposición derradeira terceira. *Modificación da Lei 21/2003, do 7 de xullo, de seguridade aérea.*

Modifícase a Lei 21/2003, do 7 de xullo, de seguridade aérea, nos seguintes termos:

Un. Engádesse un novo artigo 45 bis, que queda redactado como segue:

«Artigo 45 bis. *Infraccións en relación coa asistencia e compensación aos pasaxeiros.*

1. Constitúe infracción grave o incumprimento das decisións emitidas pola Axencia Estatal de Seguridade Aérea en relación coas reclamacións dos pasaxeiros formuladas ao abeiro do Regulamento (CE) 261/2004 do Parlamento e do Consello, do 11 de febreiro de 2004, polo que se establecen normas comúns sobre compensación e asistencia aos pasaxeiros aéreos en caso de denegación de embarque e de cancelación ou grande atraso dos voos.

2. Constitúe infracción leve o cumprimento tardío ou defectuoso das decisións emitidas pola Axencia Estatal de Seguridade Aérea en relación coas reclamacións dos pasaxeiros formuladas ao abeiro do Regulamento (CE) 261/2004 do Parlamento e do Consello, do 11 de febreiro de 2004, polo que se establecen normas comúns sobre compensación e asistencia aos pasaxeiros aéreos en caso de denegación de embarque e de cancelación ou grande atraso dos voos.

Para estes efectos, considérase que o cumprimento é tardío ou defectuoso cando se efectúa unha vez que o pasaxeiro interpuxo demanda de execución ante o xulgado competente para coñecer dela. Para estes efectos, o xulgado competente notificará á Axencia Estatal de Seguridade Aérea, á vez que ao pasaxeiro e á compañía aérea, o auto polo cal despacha execución.»

Dous. Engádesse unha nova letra i) ao punto 1 do artigo 52, que queda redactada como segue:

«i) Nas infraccións en relación coa asistencia e compensación aos pasaxeiros, ás compañías aéreas.»

Tres. Engádesse un novo artigo 62 bis, que queda redactado como segue:

«Artigo 62 bis. *Especialidades da iniciación de determinados procedementos sancionadores.*

A Axencia Estatal de Seguridade Aérea, para os efectos de ditar o acordo de inicio dos procedementos sancionadores que instrúa por infraccións previstas nesta lei, poderá tomar como feitos que motivan a súa incoación os que constitúan antecedentes da decisión adoptada no procedemento previsto na disposición adicional segunda da Lei 7/2017, do 2 de novembro, pola que se incorpora ao ordenamento xurídico español a Directiva 2013/11/UE do Parlamento Europeo e do Consello, do 21 de maio de 2013, relativa á resolución alternativa de litixios en materia de consumo. Igualmente, incorporaranse nese momento todas as actuacións realizadas para ditar tal decisión, sen necesidade de ningún trámite adicional. O procedemento sancionador que se inicie deste modo non se suspenderá pola impugnación da decisión por parte da compañía aérea.»

Disposición derradeira cuarta. *Modificación da Lei 18/2011, do 5 de xullo, reguladora do uso das tecnoloxías da información e a comunicación na Administración de xustiza.*

Modifícase a Lei 18/2011, do 5 de xullo, reguladora do uso das tecnoloxías da información e a comunicación na Administración de xustiza, nos seguintes termos:

Un. Modifícase a letra f) do artigo 4.2, que queda redactada como segue:

«f) A utilizar os sistemas de identificación e sinatura establecidos nos artigos 9 e 10 da Lei 39/2015, do 1 de outubro, do procedemento administrativo común das administracións públicas.»

Dous. Modifícase a letra d) do artigo 6.2, que queda redactada como segue:

«d) A utilizar os sistemas de identificación e sinatura establecidos nos artigos 9 e 10 da Lei 39/2015, do 1 de outubro, do procedemento administrativo común das administracións públicas, sempre que ese sistema o identifique de forma unívoca como profesional para calquera trámite electrónico coa Administración nos termos establecidos polas leis procesuais.

Para tal efecto, o Consello Xeral ou o superior correspondente deberá pór á disposición das oficinas xudiciais os protocolos e sistemas de interconexión que permitan o acceso necesario por medios electrónicos ao rexistro de profesionais colexiados exercentes previsto no artigo 10 da Lei 2/1974, do 13 de febreiro, sobre colexios profesionais, garantindo que nel consten os seus datos profesionais, tales como número de colexiado, domicilio profesional, número de teléfono e enderezo de correo electrónico.»

Tres. Engádesse un segundo parágrafo ao artigo 8 coa seguinte redacción:

«As administracións competentes proporcionarán os medios seguros para que estes sistemas sexan plenamente accesibles e operativos sen necesidade de que os usuarios se encontren fisicamente nas sedes dos seus respectivos órganos, oficinas ou fiscalías.»

Catro. Modifícase a letra f) do punto 2 do artigo 11, que queda redactada como segue:

«f) Unha ligazón ao taboleiro de edictos xudicial único, como medio de publicación e consulta das resolucións e comunicacións que por disposición legal se deban fixar no taboleiro de anuncios ou edictos.»

Cinco. Modifícase o artigo 35, que queda redactado como segue:

«Artigo 35. *Comunicación electrónica de edictos.*

A publicación de resolucións e comunicacións que por disposición legal se deban fixar en taboleiro de anuncios, así como a publicación dos actos de comunicación procesual que deban ser obxecto de inserción no «Boletín Oficial del Estado», no da comunidade autónoma ou no da provincia respectiva, serán substituídas en todas as ordes xurisdicionais pola súa publicación no taboleiro de edictos xudicial único previsto no artigo 236 da Lei orgánica 6/1985, do 1 de xullo, do poder xudicial.

O taboleiro de edictos xudicial único será publicado electronicamente pola Axencia Estatal Boletín Oficial del Estado na forma en que se dispoña regulamentariamente. Para tal efecto, a Axencia Estatal Boletín Oficial del Estado porá á disposición dos xulgados e tribunais un sistema automatizado de remisión e xestión telemática que garantirá a celeridade na publicación dos edictos, a súa correcta e fiel inserción, así como a identificación do órgano remitente.»

Seis. Modifícase a disposición adicional quinta, que queda coa seguinte redacción:

«Disposición adicional quinta. *Dotación de medios e instrumentos electrónicos e sistemas de información.*

As administracións competentes en materia de xustiza dotarán todos os órganos, oficinas xudiciais e fiscalías dos medios e instrumentos electrónicos e dos sistemas de información necesarios e suficientes para poder desenvolver a súa función eficientemente. Estes sistemas serán plenamente accesibles e operativos sen necesidade de que os usuarios se encontren fisicamente nas sedes dos seus respectivos órganos, oficinas ou fiscalías, con respecto ás políticas internas que garantan o dereito á desconexión dixital recollido no artigo 14.j.bis e no artigo 88 do

texto refundido da Lei do Estatuto básico do empregado público, aprobado polo Real decreto lexislativo 5/2015, do 30 de outubro. Así mesmo, formarán os seus integrantes no uso e utilización de tales medios e instrumentos.»

Sete. Engádesse unha nova disposición adicional décimo terceira coa seguinte redacción:

«Disposición adicional décimo terceira. *Publicacións no taboleiro de edictos xudicial único.*

As publicacións que, en cumprimento do previsto nas leis procesuais, deban facerse no taboleiro de edictos xudicial único serán gratuítas en todo caso, sen que proceda contraprestación económica por parte de quen a solicítase.

Igualmente serán gratuítas as consultas no taboleiro, así como as subscricións que os cidadáns poidan realizar no seu sistema de alertas.»

Oito. Engádesse unha nova disposición transitoria terceira coa seguinte redacción:

«Disposición transitoria terceira. *Taboleiro de edictos xudicial único.*

A publicación dos edictos mediante o taboleiro de edictos xudicial único resultará de aplicación a partir do 1 de xuño de 2021 tanto aos procedementos que se inicien con posterioridade como aos xa iniciados.»

Disposición derradeira quinta. *Modificación da disposición derradeira décima da Lei 20/2011, do 21 de xullo, do Rexistro Civil.*

Modifícase a disposición derradeira décima da Lei 20/2011, do 21 de xullo, do Rexistro Civil, que pasará a ter a seguinte redacción:

«Disposición derradeira décima. *Entrada en vigor.*

A presente lei entrará en vigor o 30 de abril de 2021, excepto as disposicións adicionais sétima e oitava e as disposicións derradeiras terceira e sexta, que entrarán en vigor o día seguinte ao da súa publicación no *Boletín Oficial del Estado*, e excepto os artigos 49.2 e 53 do mesmo texto legal, que entrarán en vigor o día 30 de xuño de 2017.

O disposto no parágrafo anterior enténdese sen prexuízo da entrada en vigor, o 15 de outubro de 2015, dos artigos 44, 45, 46, 47, 49.1 e 4, 64, 66 e 67.3, e da disposición adicional novena, na redacción dada polo artigo 2 da Lei 19/2015, do 13 de xullo, de medidas de reforma administrativa no ámbito da Administración de xustiza e do Rexistro Civil.

Así mesmo, esta lei entrará en vigor para as oficinas consulares do Rexistro Civil o día 1 de outubro de 2020, e aplicarase de forma progresiva de conformidade co previsto na disposición transitoria sétima e nas disposicións regulamentarias que se diten para o efecto.

Ata a completa entrada en vigor desta lei, o Goberno adoptará as medidas e os cambios normativos necesarios que afecten a organización e o funcionamento dos rexistros civís.»

Disposición derradeira sexta. *Modificación da Lei 7/2017, do 2 de novembro, pola que se incorpora ao ordenamento xurídico español a Directiva 2013/11/UE do Parlamento Europeo e do Consello, do 21 de maio de 2013, relativa á resolución alternativa de litixios en materia de consumo.*

A disposición adicional segunda da Lei 7/2017, do 2 de novembro, pola que se incorpora ao ordenamento xurídico español a Directiva 2013/11/UE do Parlamento

Europeo e do Consello, do 21 de maio de 2013, relativa á resolución alternativa de litixios en materia de consumo, queda redactada como segue:

«Disposición adicional segunda. *As entidades de resolución alternativa no ámbito de protección dos usuarios do transporte aéreo.*

1. Para a resolución alternativa de litixios en que resulten de aplicación os regulamentos da Unión Europea en materia de protección dos usuarios do transporte aéreo, será acreditada e notificada á Comisión Europea unha única entidade, que coñecerá, consonte o establecido nesta disposición, daqueles conflitos que afecten todos os pasaxeiros, aínda que non teñan a condición de consumidores e xa estea a compañía establecida na Unión Europea ou fóra dela.

As entidades a que se fai referencia no artigo 6.2 que dean cobertura a reclamacións de consumo de todos os sectores económicos poderán coñecer igualmente deste tipo de litixios no ámbito de aplicación desta lei, sempre que ambas as partes se sometesen voluntariamente a tales procedementos.

2. Por orde da persoa titular do Ministerio de Transportes, Mobilidade e Axenda Urbana regularase o procedemento de resolución alternativa dos litixios mencionados no parágrafo primeiro do punto anterior, que será de aceptación obrigatoria e resultado vinculante para as compañías aéreas.

3. A entidade acreditada porá fin ao procedemento anterior mediante decisión motivada. Transcorrido o prazo previsto no artigo 20 desta lei sen que se notificase a decisión, entenderase que a decisión é desestimatoria da reclamación formulada polo pasaxeiro.

O pasaxeiro poderá retirarse en calquera momento do procedemento se non está satisfeito co seu funcionamento ou tramitación, e deberá ser informado pola entidade acreditada desta cuestión ao inicio do procedemento.

A decisión adoptada pola entidade acreditada poderá ser impugnada por parte da compañía aérea, ante o xulgado do mercantil competente, cando considere que non é conforme dereito. Posto que a decisión da entidade acreditada non será vinculante para o pasaxeiro, en todo caso se entenderá sen prexuízo das accións civís que o pasaxeiro teña fronte á compañía aérea.

A impugnación da decisión, mediante a formulación da correspondente demanda pola compañía, deberase efectuar dentro dos dous meses seguintes ao da súa notificación ou, en caso de que se solicite corrección ou aclaración, desde a notificación da resposta a esta solicitude, ou desde a finalización do prazo de dez días desde que esta se efectuou sen que se notificase resposta expresa. A demanda tramitarase polas canles do xuízo verbal.

O pasaxeiro poderá non comparecer no procedemento xudicial, entendéndose que se remite á decisión da entidade acreditada. Neste procedemento nunca se imporán as custas ao pasaxeiro.

4. Sen prexuízo do dereito da compañía aérea a impugnar a decisión da entidade acreditada, transcorrido un mes desde que se emitise a decisión, o pasaxeiro poderá solicitar a súa execución ante o xulgado do mercantil competente. Para estes efectos, a decisión, debidamente certificada pola entidade acreditada, terá a consideración de título executivo extraxudicial, de conformidade co disposto no numeral 9.º do punto 2 do artigo 517 da Lei 1/2000, do 7 de xaneiro, de axuízamento civil.

En todo caso, a compañía aérea remitirá á entidade acreditada xustificante do cumprimento da decisión tan pronto como esta se produza, indicando se impugnou a decisión ante o xulgado competente.

5. Ata que entre en vigor a orde mencionada no punto 2, a Axencia Estatal de Seguridade Aérea deberá acomodar o seu funcionamento e procedemento ao previsto nesta lei co fin de que poida ser acreditada como entidade de resolución alternativa de litixios en materia de dereitos dos usuarios do transporte aéreo.»

Disposición derradeira sétima. *Modificación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.*

Modifícanse as letras d) e f) do artigo 159.4 da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, que quedan redactadas do seguinte modo:

«d) A oferta presentárase nun único sobre ou arquivo electrónico nos supostos en que no procedemento non se recollan criterios de adxudicación cuxa cuantificación dependa dun xuízo de valor. En caso contrario, a oferta presentárase en dous sobres ou arquivos electrónicos.

A apertura dos sobres ou arquivos electrónicos que conteñan a proposición farase pola orde que proceda de conformidade co establecido no artigo 145 en función do método aplicable para valorar os criterios de adxudicación establecidos nos pregos. A apertura faraa a mesa de contratación a que se refire o punto 6 do artigo 326 da presente lei.»

«f) En todo caso, a valoración a que se refire a letra anterior deberá estar efectuada con anterioridade á apertura do sobre ou arquivo electrónico que conteña a oferta avaliable a través de criterios cuantificables mediante a mera aplicación de fórmulas.

Tras a apertura do sobre ou arquivo electrónico e na mesma sesión, a mesa:

1.º Logo de exclusión, de ser o caso, das ofertas que non cumpran os requirimentos do prego, avaliará e clasificará as ofertas.

2.º Realizará a proposta de adxudicación a favor do candidato con mellor puntuación.

3.º Comprobará no Rexistro Oficial de Licitadores e Empresas Clasificadas que a empresa está debidamente constituída, que quen asina a proposición ten poder bastante para formular a oferta, ten a solvencia económica, financeira e técnica ou, de ser o caso, a clasificación correspondente e non está incurso en ningunha prohibición para contratar.

4.º Requirirá a empresa que obtivo a mellor puntuación mediante comunicación electrónica para que constituía a garantía definitiva, así como para que achegue o compromiso a que se refire o artigo 75.2 e a documentación xustificativa de que dispón efectivamente dos medios que se comprometeu a dedicar ou adscribir á execución do contrato conforme o artigo 76.2, e todo iso no prazo de sete días hábiles contado desde o envío da comunicación.

No caso de que se presuma que a oferta do licitador que obtivo a mellor puntuación é anormalmente baixa por darse os supostos previstos no artigo 149, a mesa, realizadas as actuacións recollidas nos puntos 1.º e 2.º anteriores, seguirá o procedemento previsto no citado artigo, ben que o prazo máximo para que xustifique a súa oferta o licitador non poderá superar os cinco días hábiles desde o envío da correspondente comunicación.

Presentada a garantía definitiva e, nos casos en que resulte preceptiva, logo de que a Intervención fiscalice o compromiso do gasto nos termos previstos na Lei 47/2003, do 26 de novembro, xeral orzamentaria, nun prazo non superior a cinco días adxudicárase o contrato a favor do licitador proposto como adxudicatario e, unha vez adxudicado, procederase á súa formalización.

En caso de que no prazo outorgado para o efecto o candidato proposto como adxudicatario non presente a garantía definitiva, efectuarase proposta de adxudicación a favor do seguinte candidato en puntuación, ao cal se lle outorgará o correspondente prazo para constituír a citada garantía definitiva.

No suposto de que o empresario teña que presentar calquera outra documentación que non estea inscrita no Rexistro de Licitadores, esta terá que se presentar no prazo de sete días hábiles establecido para presentar a garantía definitiva.»

Disposición derradeira oitava. *Modificación do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19.*

Modifícase o Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19, nos seguintes termos:

Un. O punto 1 do artigo 4 queda redactado como segue:

«1. A persoa arrendataria dun contrato de vivenda habitual suscrito ao abeiro da Lei 29/1994, do 24 de novembro, de arrendamentos urbanos, que se encontre en situación de vulnerabilidade económica, tal e como se define no artigo seguinte, poderá solicitar da persoa arrendadora, cando esta sexa unha empresa ou entidade pública de vivenda ou un gran tedor, entendendo por tal a persoa física ou xurídica que sexa titular de máis de dez inmobles urbanos, excluídos garaxes e rochos, ou unha superficie construída de máis de 1.500 m², ata o 30 de setembro de 2020, o aprazamento temporal e extraordinario no pagamento da renda, sempre que tal aprazamento ou a condonación total ou parcial daquela non se conseguise xa con carácter voluntario por acordo entre ambas as partes.»

Dous. O punto 1 do artigo 8 queda redactado como segue:

«1. A persoa arrendataria dun contrato de vivenda habitual suscrito ao abeiro da Lei 29/1994, do 24 de novembro, de arrendamentos urbanos, que se encontre en situación de vulnerabilidade económica, tal e como se define no artigo 5, poderá solicitar da persoa arrendadora, cando esta non sexa ningunha das comprendidas no artigo 4, no prazo de tres meses desde a entrada en vigor deste real decreto lei e nos termos recollidos nos puntos 2 a 4 seguintes, o aprazamento temporal e extraordinario no pagamento da renda, sempre que o aprazamento ou a condonación total ou parcial daquela non se acordase previamente entre ambas as partes con carácter voluntario.»

Tres. O artigo 9 queda redactado como segue:

«Artigo 9. *Aprobación dunha liña de avais para a cobertura por conta do Estado do financiamento a arrendatarios en situación de vulnerabilidade social e económica como consecuencia da expansión do COVID-19.*

1. Con obxecto de proporcionar cobertura financeira para facer fronte aos gastos de vivenda por parte dos fogares que se encontren en situación de vulnerabilidade social e económica como consecuencia da expansión do COVID 19, autorízase o Ministerio de Transportes, Mobilidade e Axenda Urbana para que, mediante convenio co Instituto de Crédito Oficial, por un prazo de ata catorce anos, se desenvolva unha liña de avais con total cobertura do Estado, para que as entidades de crédito poidan ofrecer axudas transitorias de financiamento ás persoas que se encontren na referida situación de vulnerabilidade, en forma de préstamo cun prazo de devolución de ata seis anos, prorrogable excepcionalmente por outros catro e sen que, en ningún caso, devindique ningún tipo de gastos e xuros para o solicitante.

2. As axudas transitorias de financiamento serán finalistas, deberán dedicarse ao pagamento da renda do arrendamento de vivenda habitual e poderán cubrir un importe máximo de seis mensualidades de renda.

3. A estas axudas transitorias de financiamento poderán acceder todos aqueles arrendatarios que se encontren en situación de vulnerabilidade sobrevida como consecuencia da expansión do COVID-19, de acordo cos criterios e requisitos que se definan a través dunha orde do Ministerio de Transportes, Mobilidade e Axenda Urbana, que incluírán, en todo caso e como mínimo, as situacións definidas no artigo 5 do presente real decreto lei. Esta orde non precisará desenvolvemento normativo posterior para a súa aplicación e cumprirá, en todo caso, coa normativa da Unión Europea en materia de axudas de Estado.

4. A orde do Ministerio de Transportes Mobilidade e Axenda Urbana establecida no punto anterior non estará suxeita á autorización do Consello de Ministros, prevista no artigo 10.2 da Lei 38/2003, do 17 de novembro, xeral de subvencións.

5. Para os efectos da aplicación das axudas transitorias de financiamento, establécese que no mesmo acto de concesión do préstamo por parte da entidade de crédito, de conformidade coa regulación establecida, se entenderá concedida a subvención de gastos e xuros que implique o dito préstamo, polo que non requirirá resolución de concesión do Ministerio de Transportes, Mobilidade e Axenda Urbana. As axudas na modalidade de subvención de tipo de xuro serán financiadas polo Ministerio de Transportes, Mobilidade e Axenda Urbana con cargo á aplicación orzamentaria 17.09.261N.481, Bonificación de gastos e xuros por concesión de préstamos a arrendatarios en situación de vulnerabilidade polo COVID-19. Este crédito terá a consideración de ampliable. A verificación do cumprimento dos requisitos dos beneficiarios da subvención realizaráa *ex post* o Ministerio de Transportes, Mobilidade e Axenda Urbana, conforme a normativa de aplicación.

6. O convenio do Ministerio de Transportes, Mobilidade e Axenda Urbana co Instituto de Crédito Oficial a que se refire o punto 1 e a Orde do Ministerio de Transportes, Mobilidade e Axenda Urbana referida en puntos anteriores quedan exceptuados da aplicación do disposto nos puntos sexto e sétimo do Acordo do Consello de Ministros do 27 de decembro de 2019, polo que se establecen os criterios de aplicación da prórroga para 2020 dos orzamentos xerais do Estado vixentes no ano 2019. Adicionalmente, ao convenio resultaralle de aplicación o réxime especial previsto no artigo 39 do Real decreto lei 8/2020, do 17 de marzo, de medidas urxentes extraordinarias para facer fronte ao impacto económico e social do COVID-19.»

Catro. A letra c) do punto 1 da disposición adicional vixésima queda redactada como segue:

«c) No caso dos traballadores por conta propia que estivesen previamente integrados nun réxime da Seguridade Social como tales, ou nun réxime de mutualismo alternativo a esta, e como consecuencia da situación de crise sanitaria ocasionada polo COVID-19 cesasen na súa actividade ou cando, sen ter cesado na súa actividade, a súa facturación no mes natural anterior a aquel en que se solicita a dispoñibilidade do plan de pensións se reduce, ao menos, nun 75 por cento en relación coa media de facturación do semestre natural anterior, sempre que non se encontren nalgún dos dous supostos recollidos nos parágrafos seguintes.

No caso dos traballadores autónomos agrarios de producións de carácter estacional incluídos no Sistema especial para traballadores por conta propia agrario, así como os traballadores de producións pesqueiras, marisqueiras ou de produtos específicos de carácter estacional incluídos no réxime especial de traballadores do mar, cando a súa facturación media nos meses de campaña de produción anteriores a aquel en que se solicita a prestación se vexa reducida, ao menos, nun 75 por cento en relación cos mesmos meses da campaña do ano anterior.

No caso dos traballadores autónomos que desenvolven actividades nalgún dos seguintes códigos da CNAE 2009: 5912, 5915, 5916, 5920 e entre o 9001 e o 9004, ambos incluídos, sempre que, non cesando na súa actividade, a súa facturación no

mes natural anterior a aquel en que se solicita a prestación se vexa reducida en polo menos un 75 por cento en relación coa efectuada nos doce meses anteriores.»

Disposición derradeira novena. *Modificación do Real decreto lei 15/2020, do 21 de abril, de medidas urxentes complementarias para apoiar a economía e o emprego.*

Modifícase o Real decreto lei 15/2020, do 21 de abril, de medidas urxentes complementarias para apoiar a economía e o emprego, nos seguintes termos:

Un. A letra c) do artigo 23.2 queda redactada como segue:

«c) No suposto de ser traballador por conta propia que estivese previamente integrado nun réxime da Seguridade Social como tal, ou nun réxime de mutualismo alternativo a esta, e cesase na súa actividade ou cuxa facturación se reduciase nun 75 por cento como consecuencia do estado de alarma decretado polo Goberno, presentarase, segundo corresponda:

1.º O certificado expedido pola Axencia Estatal da Administración Tributaria ou polo órgano competente da comunidade autónoma, de ser o caso, sobre a base da declaración de cesamento de actividade declarada polo interesado; ou

2.º A información contable que xustifique a redución da facturación nos mesmos termos que os establecidos no artigo 17.10 do Real decreto lei 8/2020, do 17 de marzo, para xustificar a redución da facturación na prestación extraordinaria por cesamento de actividade dos traballadores por conta propia afectados pola declaración do estado de alarma. Os traballadores por conta propia que non estean obrigados a levar os libros que acrediten o volume de actividade deberán acreditar a redución da facturación por calquera medio de proba admitido en dereito.»

Dous. A letra c) do artigo 23.3.1.º queda redactada como segue:

«c) No suposto de traballadores por conta propia que estivesen previamente integrados nun réxime da Seguridade Social como tal, ou nun réxime de mutualismo alternativo a esta, e cesasen na súa actividade ou cuxa facturación se reduciase nun 75 por cento como consecuencia do estado de alarma decretado polo Goberno: os ingresos netos que se deixasen de percibir durante un período de cómputo máximo igual á vixencia do estado de alarma máis un mes adicional, calculados mediante a declaración anual do imposto sobre a renda das persoas físicas correspondente ao exercicio anterior e, de ser o caso, o pagamento fraccionado do imposto sobre a renda das persoas físicas e as autoliquidacións do imposto sobre o valor engadido correspondentes ao último trimestre.»

Disposición derradeira décima. *Título competencial.*

Esta lei dítase ao abeiro do disposto no artigo 149.1.1.ª, 5.ª, 6.ª, 8.ª, 13.ª e 18.ª da Constitución, que atribúe ao Estado a competencia exclusiva sobre a regulación das condicións básicas que garantan a igualdade de todos os españois no exercicio dos dereitos e no cumprimento dos deberes constitucionais; Administración de xustiza; lexislación mercantil; lexislación procesual, sen prexuízo das necesarias especialidades que nesta orde deriven das particularidades do dereito substantivo das comunidades autónomas; lexislación civil, sen prexuízo da conservación, modificación e desenvolvemento por parte das comunidades autónomas dos dereitos civís, forais ou especiais, alí onde existan, en particular en materia de ordenación dos rexistros e instrumentos públicos; bases e coordinación da planificación xeral da actividade económica; e lexislación básica sobre contratos e concesións administrativas.

Disposición derradeira décimo primeira. *Intervención telemática de notarios e rexistradores.*

O Goberno remitirá ás Cortes Xerais no prazo máis breve posible, non superior a nove meses, un proxecto de lei, unha vez oídos o Consello Xeral do Notariado e o Colexio de Rexistradores de España, para habilitar a intervención telemática notarial e rexistral co obxectivo de facilitar a prestación dos servizos notariais e rexistrais sen necesidade de presenza física.

Disposición derradeira décimo segunda. *Actuacións telemáticas.*

En colaboración coas comunidades autónomas que asumisen competencias en medios materiais e persoais ao servizo da Administración de xustiza, co Consello Xeral do Poder Xudicial e coa Fiscalía Xeral do Estado, o Goberno remitirá ás Cortes Xerais un proxecto de lei que regule as normas para a celebración de actos procesuais telemáticos, preservando en todo momento as garantías procesuais previstas no ordenamento xurídico e o dereito de defensa das partes.

Disposición derradeira décimo terceira. *Entrada en vigor.*

Esta lei entrará en vigor o día seguinte ao da súa publicación no «Boletín Oficial del Estado».

Por tanto,
Mando a todos os españois, particulares e autoridades, que cumbran e fagan cumprir esta lei.

Madrid, 18 de setembro de 2020.

FELIPE R.

O presidente do Goberno
PEDRO SÁNCHEZ PÉREZ-CASTEJÓN